

DISPUTATIO MEDICA
INAUGURALIS
DE
NEPHRITIDE,

Q V A M

FAVENTE SUMMO NUMINE

Ex Auctoritate Magnifici Rectoris

D. PHILIPPI REINHARDI VITRIARII,

J.U.D. Ejusdemque Facultatis Professoris Ordinarii,

N E C N O N

Amplissimi Senatûs Academici unanimi Consensu,

& Ainae Facultatis MEDICÆ Decreto,


PRO GRADU DOCTORATUS,

Summisque in MEDICINA Honoribus ac Privilegiis
ritè ac legitimè consequendis,

Publico examini subjicit

JOHANNES PAULUS GAILLARD, Lug. Bat.

Ad diem 4. Februarii, horis locoque solitis.



LUGDUNI BATAVORUM,

Apud ABRAHAMUM ELZEVIER,

Academiæ Typographum. M DC XCIV.

ILLUSTRISSIMO NOBI-
LISSIMOQUE VIRO

DOMINO DOMINO

FREDERICO
HENRICO SWEERTS
DE LANDAS,

DOMINO DE BAERSCHOT ET IN
CORTENBERGH AC HOTTORP,
&c. &c. POTENTISSIMORUM D. D.
ORDINUM QUÆSTORI SYLVÆ-DU-
CIS EJUSDEMQUE CIVITATIS CON-
SILIARIO ET SCABINO,

*Hæc Inauguralia ut observantia suæ testi-
monium publicum*

D. D. D. C.

JOHANNES PAULUS GAILLARD,
JAC. FIL. *Auctor.*



DISPUTATIO MEDICA

INAUGURALIS

DE

NEPHRITIDE.

THESIS I.



Tymologiam Nephritidis inquirentibus, & Linguae Graecae aliquomodo tantum gnaris, statim sese offert ut ejus origo vox ΝΕΦΡΟΣ Ren dicta; unde rectam illius morbi dabimus denominationem, si dicamus Nephritidem esse dolorem Renum productum à quacumque materia ledente aut inflammante: hujus autem causam antequam examinemus, non inconcin-

num erit, si aliquid de structura & situ Renum, ut & de illorum functionibus in medium proferamus.

THESIS II.

Duo conspiciuntur sub Diaphragmate in regione Lumbari Corpora oblonga, satis dura, & pro statu corporis magis aut minus obeso, pinguedine vel pariori, vel copiosiori recta, Phaseolum formâ suâ non malè repræsentantia, Renes dicta, ex variis partibus constructa: sed omnes quia minus ad materiam hanc nostram faciunt, principales tantum quâ poterimus brevitate, & quasi transcurrento (ut ita loquar) attingemus.

Et quidem 1. sese offert *Arteria* notatu dignissima, Anatomicis *Emulgens* dicta, ab Aorta originem sumens. 2. Occurrunt *Nervi* ab octava conjugatione oriundi, quaquaversus per *Renum* substantiam dispersi. Adsunt 3. *Vasa Lymphatica* Lympham vehentia in unam atque alteram glandulam à latere vasorum emulgentium conspicuam, è quibus glandulis in saccum Chyliferum detruditur. 4. Adsunt & *Tubuli, Renales* dicti, per *Renes* dispersi; ex exiguis glandulis producti, particulas recipientes Urinosas, easque in pelvim ducentes, & hinc per Uretheres in Vesicam.

Uusus eorum est Lympham secernere, postmodum detrudendam in saccum Chyliferum. Dein Urinam secernere quam in pelvim deponunt, & hinc [ut diximus] in Vesicam per Uretheres. Sunt autem illi duo Canales oblongi, teretes in varios flexus & reflexus, ex *Rene* tam dextro quàm sinistro procedentes; habent duplicem tunicam, quarum superior pars pelvis, inferior verò terminum constituens per duplicaturam Vesicæ membranarum obliquo ductu fertur quasi valvulâ instructa foret.

T H E S I S III.

Datâ *Renum & Uretherum* descriptione secundum Situm, Figuram, Contenta, & Functiones, ad ipsam eorundem læsionem properamus.

Considerabimus igitur nunc *Renes* tanquam corpus solidum recipiens ulterius propellendos humores, unde eadem incommoda quæ alias infestant partes, hîc etiam locum obtinere statui-
mus mutatis tantum mutandis ratione ministerii illius partis in nostra Oeconomia; hinc omnia morborum effecta eadem ferè sunt in universo corpore, id est, ministerium & regimen ipsum lædenti.

Hæc læsio vel merâ obstructione & infarctu pororum & meatuum absolvitur, ita ut languido motu tantum miseras suas absolvant functiones; vel mediante *Inflammatione* cursu citiori procedenti: unde corpuscula motu celerrimo agitata quævis vasa porosque etiam angustissimos pungunt, vellicant, & admodum dolorificè afficiunt; donec tota sæpius cohæsiō naturalis aut alteretur in suo situ, aut pro maxima parte aboleatur. Cum autem in definitione exhibuimus dolorem, ideò præsertim respicimus violentam hanc læsionem à particulis mobilioribus salinis & acrioribus productam; relictis igitur prioribus læsionum speciebus unice hisce insistemus. Cau-

Causas igitur *Doloris Renum* potissimum agnoscimus tres : scilicet *Inflammationem* tanquam generaliore causam ; *Calculum* majoris minorisve molis tanquam læsionis perpetuum stimulum ; quamdiu mobilitate & irregulari asperâ figurâ suâ fricationes, alterationes , & abrasiones varias producit ; & tandem *Ulcus* ex utrisque his sæpius resultans.

T H E S I S . IV.

INFLAMMATIO est irregularis & violenta quorumvis acrium corpusculorum pressio per minima interstitia vasorum solidorum cum arietatione maxima ad latera. Hinc omnia phænomena *Tumoris, Ruboris, & Caloris* resultant in parte inflammata. *Tumor* nempe ab infarctu copioso ipsorum corpusculorum etiam minimos recessus penetrantium, replentium, & distendentium. *Rubor* ab exaltatione particularum oleosarum, & præsertim ob fugam particularum Lymphaticarum aquosiorum, unde particulae ramosæ magis ad se invicem accedentes & læviorem superficiem per motum acquirentes, rutilanti rubedine insigniuntur ob reflectionem validiorem luminis. *Calor* à continuo salium sphericis particulis junctorum, tam motu quàm vellicatione & lincinatione, circa fibras nervaceas admodum tensas resultat : adde quòd effluvia spirituofo-salina ætheris motum sequentia fortius non solummodo agitent immediatè adjacentes, sed etiam remotas particulas cujusvis notæ fluidas & solidas, hinc etiam validiores humorum propulsiones & rarefactiones à turgescencia Salini spiritûs communicati : hinc aucti motus contractorii & dilatatorii vasorum ob influentiam spirituum animalium particulis illis incitorum. Ex hisce etiam sensus tristis seu doloris idea adsurgit, in quantum læsiones plurimæ procurantur ab acutis hisce spiculis & torrentis instar agitatæ particulis [ut ita loquar] igneis, salino nempe sulphureis.

Quamdiu enim perstat valida propulsio corpusculorum spirituosiorum secum trahentium corpora majoris molis, tamdiu *primò* fit impetus in nervosum sensibile genus ob tenuitatem earundem particularum. *Secundo* fit infarctus humorum crassiorum. *Tertiò* fiunt læsiones & divisiones in plurimis partibus solidis illiada malorum producentes ; ideòque non immerito *Nephritidis* causam primariam assignavimus *Inflammationi* : causas autem *inflammationis* ulterius prosequemur.

T H E S I S V.

Ut pars solida inflammetur necessariò præcedere debet corpus aliquod undique spiculis eminentibus armatum, majoris extensionis & molis quàm ut per hoc aut illud vas possit sine allisione violentâ ad latera permeare.

Obstructionem igitur non agnoscimus autorem *Inflammationis*; quoniam omne obstruens motum & ejusdem effecta tollit per illa vasa consuetum; cùm igitur Inflammatio necessariò involvat motum, & quidem motum calidum; ideò obstructio quâ obstructio est potiùs contrarium quid *Inflammationi*: Dein rejicimus & sententiam eorum qui partes inflammatas seu igneas soli ætheri subtilissimo pervias esse dicunt, ita ut in eodem innatare videantur; quoniam ignis eò violentior ardet quò tempestas est frigidior, & aër humidior ventis maximè lustratus: è contra aëris accessu negato penitus suffocetur, ut & ardente Syrio æstu in sole repositus ignis duplo debiliùs ardet & consumitur quàm Hyeme, sic etiam carbo cujusvis ligni sepultus in firmissimo crucibulo undiquaque lutato, etsi per annum integrum in furno vitriariorum detineatur, non consumetur, quamvis recipiat particulas subtilissimas. Ideòque potiùs confugiendum erit non ad solum ætherem, multò minus ad obstructionem: sed ad figuram corporis admodum asperâ & acutâ superficie dotata fortius impellendi in angustissimas vasorum ramificationes, vel annectendi, & postmodum adigendi instar cuneolorum in transversas fibras & latera vasorum, ubi vias præternaturali modo violentè aperit, non sine acutâ sensatione nervulorum ibidem dispersorum.

Moram ibidem diu nectere nec possunt nec debent illæ particulae, quoniam à contractione laterum ac ab impulsione humorum semper ac semper ulteriùs protruduntur, dolores perpetuò auctos & augendos exhibentes, quamdiu angusta vasorum approximatio durat, ipsique nervi hîc illic occurrant ulteriùs ac ulteriùs lædendi; imò tamdiu perdurare debet actus malignus, quamdiu impunè grassatur illud corpus malignè figuratum.

T H E S I S VI.

Figura igitur hujus corporis *Inflammationem* inducentis non aliunde derivari potest quàm à sale tanquam à corpore pungente,

gente , è meris punctis constituto , diversimodè disposito in interstitiis terræ levioris ramosæ dictæ , vel quacumque aliâ ad perversam & pertinacem figuram inclinante , ita ut inde aculei , cuspides , unci , vel cujusvis notæ figuræ acres , acutæ & malignæ dictæ , proferantur. Hæ particulæ statim ubi subintrârunt corpus nostrum 1. humores , id est , partes fluidas : 2. organa seu partes solidas afficiunt , utraque hæc lædendo in figura & in functione. Insuper omnia salia quovis modo considerata per se agentia , & in unum locum arietantia , idem malum producant : sed non tam magnum quàm ubi nexus & copula terræ levioris sphericâ asperâ figurâ dotata accesserit : sic enim olea vigecuplo fortiora sunt quàm spiritus , decuplo fortiora quàm salia *Volatilia* dicta vel *Fixa* , sic Lapis infernalis eò fortiùs & magis corrosivus redditur per metalla & mineralia , quàm Ruptorium commune : sic Butyrum Antimonii constans è Spiritu Salis & Antimonio , decuplo fortiùs agit quàm Spiritus Salis optimè rectificatus.

Hinc liquet & figuram è copula & motum illius figuræ requiri , antequam igneus ille motus producat , reliqua autem ad causam hanc facientia & necessariò concurrentia brevitatis studio prætermittimus : sufficit autem nunc ad proximiores & magis familiares causas transisse.

Inter has agnoscimus tanquam *Primas* , *Acrium* & *sicciorum* *aromatum nimius usus* , unde serum molle diluens humores nimis dissipatur , vel rigidioribus salinis particulis imprægnatur , quibus postmodum teneris *Renum* vasculis communicatis exordia profluunt 1. *Stranguria* vel *Ardoris Urina* , postmodum à continuante impetu etiam ardor & dolor *Renum* , ut patet in usu immoderato *Zinziberis* , *Cubebæ* , *Caryophyllorum* , &c. Hisce etiam annumeranda veniunt *Caseus antiquior* , *Insecta* admodum *acria* pro diureticis imprudenter adhibita , ut sunt *Cantharides* , *Cimices* , *Millepedes* , *Vermes Majales* ; tandem sub hac Classe etiam annumeranda *Venena* ad ultimam malignitatem pertingentia , *Re- nes* miris modis afficientia , præsertim si existant *lenta Venena* , quæ enumerare hîc supersedeo , ut & ea quæ medullam spinalem afficiunt , particulas nempe balsamicas & oleosas molles invertendo.

T H E S I S V I I .

Secundum locum meritò sibi vendicant *Catharri*, qui nihil aliud sunt nisi acris & muriatica falsuginosa lymphæ consistentia, unde fluidior & serosior justò redditur, magis eminentia & decarcerata offerens spicula ratione varia; postmodum ipsa vasa afficiens, præsertim circa *Renes*, ubi copiosius tunc temporis defertur, vel potius quoniam eò magis sensibiliter stimulantur vasa ad excretionem per urinam, unde etiam regio *lumbaris* circa *Renes* dolore acuto molestat, cùm morbus *Catharrosum* continuatur.

Tertium locum occupant *diuretica diutius continuata*, sive ea sint oleosa vel salina, imprimis si acria sint; fibrillæ enim inconsideratiùs motæ & vellicatæ sensim ac sensim atteruntur, donec nudiora nervorum velamina jaceant faciliùs, postmodum develanda nervis, dein quibuscvis injuriis nudis & obviis.

Quartum locum possident *potus quivis acres* aut nimis recentes aut nimis vetusti; quoniam nil æquè alterat debitam lymphæ consistentiam quàm potulentus liquor nimiam ingluvie assumptus, inde enim integra aliquali perstante figura crudiori, id est, non benè alterata & accommodata ad figuram corporis transit ad mixturam cum aliis humoribus à potu debellandis, & ad aliam figuram acrem reducendis; postmodum noxam *Renibus* inferentibus, ubi læsiones violentas sæpissimè procurant suâ insinuatione violentâ in fibrosum & fungosum contextum *Renum*, ut in *Ulcere* proximè patebit.

T H E S I S V I I I .

Non minimam ansam *Dolori Renum* præbent *moles terrestres ad lapideam & arenosam consistentiam redacta figurâ externâ circa superficies inæquali, scabrâ, & asperâ dotata*, duo maxima mala producentes: 1. Obstructionem meatuum & tubulorum: 2. Frictionem & attritionem violentam laterum & parietum.

Obstructio hæc infinita producit symptomata in quantum stagnationes & retentiones humorum inde producuntur, quoniam hoc modo retardatum serum falsuginosum & urinosum in se mutuo conflictatur summâ cum alteratione statûs & sitûs naturalis. Inde igitur, ut & in omni motu intestino, è luctâ illâ internâ prosiliunt Salina acria corpuscula tenuioribus oleis combinata, sensim sese non solummodo extricantia, sed insuper tandem

dem sese parietibus illorum canalium annectentia, insinuantia; & vi sibi vias transversas parientia, eò faciliùs quò magis distensa fuerint latera illorum vasorum à copioso infarctu humorum nimis diu moram ibidem trahentium.

Illud infinitis experimentis patet; nam quidquid *Chymia* offert in amœno fluidorum exercitio per motus variegatos, illud unicè transit in salis oleosi & tenuioris extricationem; si quis autem *Chymicis* operationibus credat multum interesse à naturalibus in œconomia nostra sese offerentibus, ille facilè in meliorem semitam deducendus veniet, ubi animadverterit diversitates modificationum omnium fluidorum & solidorum in statu naturali & præternaturali, ut patebit in *Ulceribus* pus diversissimum fundentibus, semper autem ad magis salinam & acrem figuram vergens, quod ex odore, sapore, & coloris mutatione sufficienter apparet; adde quòd *Chymia* ratione fluidorum & solidorum tantum naturaliter operationes efficiat.

Ex eadem causa dolores in Renibus miserrimos sæpè cruciatus exhibent, ubi vel vitæ sedentariæ indulgent vel diutinum admittunt in dorsum decubitum ægri: ut & ii quibus studia sunt frequentiora cum meditationibus spiritus animales aliò deferentibus; hinc enim magis vappida redditur lymphæ ad acidum inclinans, acribus attamen particulis hîc illic instructum, præsertim ubi per subsidientiam vel approximationem viscidiorum humorum irregulariter sero innatantium fiunt allisiones, arietationesque inconditæ salinæ materiæ; ita ut tandem mediante alteratione aut turbatione nexûs illius in apricum prodeant è claustris suis profiliencia Salia postmodum vagabunda quod patet in jusculis gelatinæ consistentiam obtinentibus, sensim ac sensim dilatioribus, foetidis, acribus ac malignis factis post aliquot dierum asservationem.

Hac ratione etiam è similibus liquoribus leviori etiam motu salia & spiritus oleosos in altum elevat *Chymicus* relictis in fundo aquis, & terris crassioribus antehac potius præcedentibus ipsum sal, aut ad minimum simul cum ipso adscendentibus, quod non semel ex *Urinâ* recenter à *Nephriticis* editâ observare licuit; ubi nempe ad foetoris & acredinis notam summam per-tigerat: omitto hîc *Calculi*, *Arenularum*, & *Saburra* solidioris incunabula, & progressus, ne hisce pagellis tœdium

RI BENEVOLO inferam nimis longus existens, unicus enim mihi scopus existit doloris causas perscrutari, & obferre, quas uno verbo ex sale acriori impunè grassante & nervosum genus molestante vel ladente deduco.

THESIS IX.

ULCUS est discontinuatio partis solida humore natura peregrino, Pure dicto, repleta aut replenda.

Quæcumque causa pungens & acuta & cujusvis alijs notæ materia acris hoc inferre potest, attamen non sine præcedenti inflammatione & læsione successivâ; hinc præcedentes causas obiter attingemus. Materiam majoris molis asperam & acutam arctiores & angustiores tubulos invadentem, latera inquietantem, & transverso irregularique modo procedentem, agnovimus *Inflammationis* causam. Majorem saburram & coagula lapidea obstructionem & attritionem asperam procurantia statuimus stagnationis & motûs intestini Auctores, producentes particulas acuminatas facilius divortium nexûs solidæ læsæ partis sese insinuant, quod obiter hic notari libet in præcedenti Thesi prætermissum; nam majora illa fragmenta aspera perpetuò lateribus molesta violentas contra naturam aperturas inferunt, in quas acerrimæ particulae impingunt, & tandem ulterius ac ulterius sese insinuant ad ruinam trahentia partem affectam.

Non mirum igitur si pessimum effectum *Inflammationis* & *obstructionis* violentæ sit *Ulcus*; fluidorum enim natura cum perpetuò volubilis sit, mutans indefesso suas vicinias, ideò necessario se mutuò afficientes & atterentes superficies, sepimenta, & retinacula, tandem tollunt, in quibus antehac nidulabantur salia cum *Æthere* illic ludentia in *Dedaleis* illis recessibus; nunc autem ubi non amplius coërcentur à terrâ ligante & aquâ diluente sui juris facta non cessant moveri: sed in vicinos parietes ruunt, eos perforant, rodunt, & tandem totaliter discontinuant; imò in pulpam dein convertunt, ac si dissoluta esset terra in sale; exinde fiunt Lacus, Stagna, Paludes è congregatis & in unum locum collectis omnibus humoribus ibidem antehac sævientibus; hisce accedit quod laceffiti nervi & vascula lymphatica tenuem suum & spirituosum succum copiosius illuc persundant per orificia nimis patulo ore hiantia

tia, facta ope læsionis; unde tantò violentior motus & infarctus circa illa loca. Tandem non minoris notæ existunt effluvia ex illis partibus inquinatis sese offerentia, humores incitantia ad majorem æstum & ferociam unde sensorium commune

1. Validè afficitur:
2. Equilibrium motûs & figuræ tollitur:
3. Alterationes statûs naturalis plurimæ conspiciuntur per febres, vigilias, &c.

Collectiones & elaborationes Puris tam diversæ sunt quàm sunt diversæ figuræ corporum; sufficit enim mera figuræ alteratio in levissima aliqua quantitate corporis ut statim invertatur actio, motus, & omnimodæ figuræ pristinæ totius corporis annihilatio, seu mortificatio subsequatur, quod ubique demonstrant maligni morbi, venena, miasmata per aërem sparsa, alimenta & potulenta assumpta, præterquam quòd sufficienter ad oculum demonstrari possit in mixtionibus & motibus Chymicis, quæ tamen exactè delineare nec tempus nec otium permittunt: satis sit quòd pro mutatione puris ad magis tenuem & liquidam substantiam dolores semper acutiores sint circa *Re-nes*; ideòque magis exquisitus adhuc est sensus, quoniam seri *Urinosi* depositio nunquam fit sine manifesta falsedine immediate apparente, unde tantò violentius est *Ulcus* in illis quàm in aliis partibus, per stimulum illum *Salinum Puris* malignitatem augentem. Hactenus de *Causis* dicta sufficiant, nunc ad ipsam morbi notionem transeo.

T H E S I S X.

Exactis delineare coloribus Signa Diagnostica omnia impossibile est, testante id Galeno lib. 2. *de locis affectis* cap. 5. nam valdè inter se concurrunt signa: communiora autem sunt *Calor circa Renes cum dolore sæpius ad latera mentiente Pleuriticos dolores, nunc in dextro nunc in sinistro latere, apparente sæpius cum magna pressione circa inguines, & nausæa concomitante: Urina difficilis excretio, sæpiusque dolorifica, ejusdem evacuatio ob particulas nimis acres salinas ibidem prædominantes: stupor cruris: nausea non raro cum vomitu, accedente sæpius febre, ob particulas salinas sanguini nimiùm communicatas. Accedunt insuper libidines inconsuetæ venereæ, præsertim in principio Nephritidis, ubi magnos nondum fecerit progressus, magnum enim commercium particulae hæ salinæ obtinent cum vasis feminalibus & ipso semine magis*

ad rarefactionem & Oestrum venereum incitandis, ut patet in omnibus salacibus dictis, quod etiam ulterius manifestatur post Diureticorum usum stimulantium ad libidinem veneream, ut & post usum Aromatum non admodum acrium ob salem tenuem oleosum ibidem copiosius nidulantem: idem sæpius contingit post opiata & anodyna assumpta ob tenuissimum sal volatile facile extricandum ad voluptuosam titillationem spirituum seminalium excitandam, si autem ullibi *signa Diagnostica* apprimis haurienda veniant, illa non alibi æquè ac in ipsis *Urinis*; colatorium enim feri urinosi cum *Renes* existant necessum ut in illis vasis malè figuratis maxima fiat ipsius humoris modificandi alteratio: sequentia ergo à me visa & observata proferre liceat salva Doctiorum & magis Exasciatorum judicio, auctoritate, & experienciâ, quibus refragari mihi piaculum esto.

T H E S I S X I.

Urina in principio tenues plurimis crystallulis salinis refertissimæ conspiciuntur, straminei aut vinosi admodum rutilantis coloris. Ratio mihi videtur esse quia tunc sedes nondum fixas nec planè immutatam Renum substantiam obtineant corpuscula sævientia salina, nondumque coalitiones crassæ materiæ viscosæ per abrasionem violentam aut secessum terræ ramosæ factæ fuerunt, turbationem postmodum *Urina* inducentes.

Urina sensim rubentiores factæ cum ardore circa orificium penis ejectæ, subsidentiam crassam rubram exhibentes, denunciant *Ardorem* seu *Inflammationem Renum* invaluisse, ita ut particulæ Salinæ oleoso-acres per motum intestinum violentum excussæ sui juris factæ etiam ipsum mucum deradant, sensibiliterque fibrillas nervaceas circa latera vasorum disseminatas afficiant: hypostasis autem in refrigerata *urina* subsidens ab illis dependet salibus terram mucaginofam solventibus in calore, quoniam in frigore non sufficienter mota & arietantia salia deponunt, quod patet ubi super ignem imposita *Urina* omne sedimentum denuo sublevat.

Hoc in Chymicis solutionibus per salia factis ad oculum demonstrant experimenta Chymica, quæ omnia recensere nimis longum foret; sufficiet indicasse solutiones hæc in frigido factas diutissimè permanere limpidas, in calore autem impetratæ divisiones ex tempore post refrigerationem subsidentem dimittent, terram denuo in calore disparentem.

Urina serosa instar feri lactis existentes signum præbent divisi-
 nexûs balsamicæ & oleosæ terræ suo sale spirituosæ privatae, unde
 minus diaphana *urina* coaguli in Renibus frequentiam denotat;
 præprimis ad arenosam & lapideam consistentiam faciescentis,
 arguitque præsentiam acidi illic grassantis ad austerum vergentis,
 seu (ut vocabulo barbaro Auctorum utar) arguit spiritum adesse
 Gorgonium lapidificum. Si autem hæc *Urina* sit merè *aquosa*
 Diaphana manifestè demonstrat catharrum præsentem aut futu-
 rum, tantò magis si hæc *Urina* perstet super ignem limpida, sin
 autem coaguletur utraque, signum est Calculi vel Hydropis. *Urina*
 admodum *viscosa*, spumosa, & lentæ albicantes ita excretæ signa
 præbent PURIS vel ULCERIS RENUM eò malignioris quò
 hæ *Urina* magis foetida ad flavedinem, virorem aut nigredi-
 nem declinent. Hæ autem *Urina* sua præbent indicia cæteris
 paribus vel concomitantibus doloris, nempe circa regionem lum-
 borum, ardorem & difficultatem *Urinae* evacuandæ; hisce igitur
 supersedeo, donec meliora mihi allucescant, ad *Prognosim* festinans.

T H E S I S XII.

PROGNOSIS etiam difficillima; saltem maximi periculû
 morbum esse, nemo inficias ibit; præsertim si ad abscessum teten-
 derit, aut si macilentos viribusque debilioribus instructos inva-
 dat; nam omnes humores hoc modo patiuntur acredine majori
 incitandas, ut superius in *Inflammatione* notavimus, & in *Ulcere*.
 Lympha enim omnis exacerbat, Spiritus animales exasperantur,
 sanguis acrior & tumultuosior redditur, mixturam turbatam
 iniens; hinc Febres, Vigiliæ, Deliria, Vomitus frequentes,
 Tabes dorsalis, & cætera maligna Symptomata in apricum pro-
 deunt: postmodum in Gangrænam, Sphacelum, Hydropem,
 Marasimum & Mortem desinentia.

In senibus incurabilis est, testante id Hippocrate *Aph. 6.*
Sectionis sextæ, dum inquit, *Renum & Vesicæ vitia difficillimè in*
senibus curantur. In junioribus spes major affulget, nisi alia in-
 dicia defectûs & imbecillitatis virium obstiterint à præcedente
 vel concomitante morbo, ut & facilius curatu sese sistit hic
 morbus recens quàm inveteratus, quoniam rarò medicamenta
 ad partem affectam pertingunt illæsa & integrâ figurâ: adde
 quòd perpetuæ alluvies violentæ figuræ & actionis malignita-
 tem foveant in illis locis muriatico sale scatentibus.

T H E S I S XIII.

CURATIO si ullibi hîc saltem, in principio est instituen-
da, antequam vires eundo acquisiverint mala serpentina: hæc
autem cura ex causis contrarium indicantibus est petenda;
ubivis autem ea maximè conducunt quæ sunt balsamica, crassa,
oleosa & mucaginosa, ipsum salem nimis acrem & nimis co-
piosum undique investientia, & circum cingentia, eorumque
intercapedines replentia suis particulis obtusis, attamen molli-
bus, terrestribus. Insuper requiruntur aquæ diluentes, po-
tius autem puteales, ubi *inflammatio* peccat Aluminoso & Am-
moniaco sale muriatico nobilitatæ, ad particularum ferociam
& exæstuationem sedandam, porosque nimis dilatatos contra-
hendos, & in statum pristinum reducendos.

E contra autem quando Calculus similisque saburra peccat
ibi aquæ Thermales Spadanæ, infusiones cum aquis ferventi-
bus factæ, sunt propinandæ, ut majori nisu particulæ crassæ &
lentæ averrantur, diluantur & expellantur: imò si opportuni-
tas detur ipse Calculus sensim abrâdetur & imminuatur; hinc
convenit iis, cautè tamen, salia muriatica, & quævis Diure-
tica. Cautè tamen illam miscelam adhibendam monui, ne
nimia accumuletur & agglomeretur inoles ipsius limosæ mate-
riæ, postmodum infarciens & ulteriùs infarciens vasa.

Si ulcus adfuerit unicè conveniunt Emulsiones Gelatinæ, &
mucagines, ut & Balsama è crassioribus ramosis confecta, non
unâ septimanâ administranda, sed ad minimum per mensem
unum, alterum, tertium, donec planè figura vitiata tollatur,
& partes fartæ tectæque appareant ex effectis.

T H E S I S XIV.

DIÆTA sit moderata, cum primis ex oleribus leviter Diu-
reticis & Anodynis coctis in jusculis (verbi gratiâ) ex Cucu-
meribus, Portulacâ, Lactucâ, Endiviâ, Petroselino, Chæ-
refolio, Oryza, Mileo, Hordeo, &c. Vitentur omnia acria,
piperata, salita, ex fumo indurata, ut & Caseus antiquior.
Abstineant à potu nimis generoso, præcipuè ad acidum etiam
vergente, Cerevisiâ aut Vino Rhenano. Exercitia sint mode-
rata, præprimis levis ambulatio adsit. Animi Pathemata sint
tranquilliora, si miseræ vitæ leviolem velit imponere

F I N E M.

JOH. PAULI GAILLARDI,

JAC. FIL.

APOLLINIS LEYDENSIS

DOCTORALIS IN MEDICINA,

LAURUS.

Dum Zenon fama, titulique arderet amore,
Anceps, quâ aeternum quareret arte decus.
Protinus & patrios Lares, Terrasque relinquens,
Ionium Delphos per mare tentat iter.

Ut venit, Templum subiens, Oracla petebat.

Supplex; quæ nostro sic cecinere Sopho,
Indue terribilis Zenon tibi lurida lethi

(a) Ora; hinc egregium Nomen in orbe manet.
Sic mihi divino, GAILLARD, videbaris ab æstro
Percitus, & quarens post tua fata decus.

At nullum rabidis remaneret Nomen ab armis,
Nec Te laudarent prælia gesta diu.

Ite triumphales, Studiis concedite, lauri;

Cedite Threïcii prælia Martis opus:
Eia age Apollineis juvet impallescere chartis.

Hæ Tibi mansurum Nomen in orbe dabunt,

Fallor? an, ut miseros vidisti Marte cruento

Mille perire homines, vulnera mille pati:

Sat bellis, Martique datum est: procul hinc, procul omnis

(Exclamans) homines qui superesse cupit?

Mille patent aditus Libitinae, vulnera mille:

a) id est daret se studiis à quibus livor.

Quam

Quàm decuit medicas nunc adhibere manus.
 Hinc Te Poeoniis statuisti tradere sacris:
 Dumque alios Bellum, Te Medicina tenet.
 Te Medicina tenet: quam Cynthius extudit artem
 Primus & hanc agris attulit Augur opem.
 Auxit at inventam solers Epidaurius: artis
 Perfecta laudes, Tu Coë, solus habes.
 Hanc & Romulida, gens hanc facunda, Pelasgi,
 Thurilegi hanc Arabes, hanc coluere Rēges.
 Tot Tibi sunt stimuli, quot habes exempla virorum
 Immortale decus quēis Medicina dedit.
 Sed nec eges: operi nullis cogentibus instas,
 Et studia assiduè laudis amore premis.
 Quin etiam egregium specimen nunc prodis, Amice,
 Ingenii vires acris abundè probans:
 Hac exantlati noctesque diesque labores
 Quàm Tibi profuerint, pagina docta docet.
 Cautus enim fontes ac signa NEPHRITIDIS alta
 Pandis, & hunc morbum pellere ritè doces.
 Maeste animis! Savum superas, GAILLARDE, dolorem,
 (b) Aspera cui virtus stoica succubuit.
 Ergo quisquis erit morbo vexatus acuto,
 Ad Te confugiat, Te duce sanus erit.
 Quique aliis morbus fuerat mala causa doloris,
 Hic pariet laudes, latitiamque Tibi.
 Quin igitur pergas, cœptis insistito, PAVLE,
 Leida dedit vitam, nomen Apollo dabit.
 Omnia fortunet Summus, conatibus adsit,
 Hisque meis votis annuat, atque Tuis.

(b) ut patuit in Heracl. Dionysio Stoico, qui ex renibus laborans, ipso in ejulatu, clamavit falsa esse illa quæ antea de dolore ipse sensisset. Cic. 2. Tuscul. Quæst. §. xxv.

Hæc Amico litavit, invitâ Minervâ;
 L. F. BONETUS Th. Fil. Med. Cult.